

## **Mattup ki Pool yi riine a don a Kolos**

*En urzi k'ono don kun t'oone adda mattup ettiyo*

Ette mattup ki pool yi riine a don i ziipe addan a Isa a geeger Kolos. Yode batum ki Kolos yi k'iide ye, wo y'a illiga don i ziipe addan a ummey gen, an seedu zakidfi a urzi zaapu k'adde a Isa me. Gen Epapiras yon wede an sooru soo ti Pool, an gizite urzi Rabila Majjaanawa ki poone me.

Ozzinagi miibi k'ita man, don doolo an d'iide ki Kolos, a don geeger gette an an di gizite ono don ti doolo a ki t'iide a Rabila Majjaanawa ere ki Epapiras y'an gizite gettiyo ye. Duwo gen an an di ruute, wede yi dehu Raa y'a y'utte man, y'an d'ottile a maaleekiyagi wo a suldfi don i ceeriyo don tudde. An an di ruute son, an di waldfa ponde wo suldfi don ongo k'ombo ulu. Epapiras y'illiga man, y'a iide y'a uuney Pool a geeger Room yon dangay, man yi di t'iide taaya. Aame Pool y'illiga inkino man, y'an di riine mattup kono y'an di kize a don Kolos gen, wedusu yi t'oone uttiyo t'urzi zaapu k'adde a Almasi danjal.

### *Toose ki Pool*

<sup>1</sup> Mattup ette i raaniya nun Pool wede zina k'Isa Almasi aa Raa yi dehu, nun ti leemadin

Timote, <sup>2</sup> a kune dɔŋ ki Raa a geeger Kolos\*, kune zamba dɔŋ daayum i seedu zakidɪ a Almasi, i lekkiyo kettiyo kaŋ soo ti yode. Geŋ beeko ti toose ere ki Meegin Raa i koonaa eggun.

*Pool yi tondiyo Raa kono zamba a Kolos*

<sup>3</sup> Adda tondiyo Raa ere daayum kaye ay tondiyo kono kune gette, ay rootiyo koduwo a Raa Meeki Galmeegin Isa Almasi, <sup>4</sup> kono ay illiga a lekkiyagun ere kun zaapu addugun a Isa Almasi wo kun'ni geyyiso dɔŋ pay ki Raa me. <sup>5</sup> Kun isiyo inŋkino kono kun zaapu elkisagun a munda wede Raa y'un boohiyo a kandaane. Zaapu k'elkisagun gette, kun ti zuune t'urzi k'ono dɔŋ dɛrec ki Rabila Majjaanawa aame t'iina di kune geŋ me. <sup>6</sup> Rabila Majjaanawa gette ti-tepiyo adda siido pay, ti d'aagulu aa undumu y'ohire wo yi d'ehiyo inŋni. Geŋ inŋkino a t'aaze di kune ti onniyo ere ki poone, kun d'illiga ono dɔŋ ki beeko Raa, wo kun di zuune geŋ dɛrec. <sup>7</sup> Dooyiso gette unni duuye Epapiras leema wede ki geyyiso, yode wede naabadey kaŋ soo. Yoŋ daayum yi seedu zakidɪ a naabo k'Almasi ere y'isiyo a kune te. <sup>8</sup> Yoŋ y'ay t'iide taaya a geyyiso ere Unde Raa t'un ele adda k'addugun gette.

<sup>9</sup> Kono kamo ti onniyo ere ay illiga rabilagun geŋ, kaye toŋ ay k'ooliyo ye ti tondiyo Raa kono kune me. Ay yi tondiyo y'un di'n ôone ti suuniyo ki suldi dɔŋ pay Raa addi i dehu, t'urzi pay ki suuniyo k'ono ti eego soodo a elkiso kane dɔŋ

---

\* **1:2** 1.2 Kolos gette geeger ŋeŋko ki siido Pirizi a kese peedo ti koliyo ki geeger k'Epez, k'a ozire kuɓbaara meeda sire doo min k'a ti t'oono kollo.

Unde Raa t'un ele. <sup>10</sup> Injino man kun d'aane kun di lekke aakede don i daaniya urzi Galmeega an di lekke, wo daayum kun d'ise munda wede ulbi i-d'ise unse. Geɗ kun d'isa naabo pay ere tuuku beehiye wo Raa kun di y' suuna adda k'addugun a ceera ki ceeriyo. <sup>11</sup> Kaye ay tonɗiyo Raa y'un t'ele toogo a ume tuuku ton man t'urzi toogadi ere meeda ki ki ti dooze ye gettiyo, kono kune a sulɗi pay kun di seeda zakidi ti ombiɗe bini danɗu. <sup>12</sup> Kun rooto koduwo a Meega Raa ti unsuwo, yode wede un di'n ize don aane a t'ooney aggaɗan t'adda sulɗi don yi boohiyo a kane donɗi adda mozikadi ere a toore gettiyo. <sup>13</sup> Yoɗ y'in di'n uɗɗe ti bey k'Ere toogo adda zimolo, wo y'in di'n t'iide k'adda moziko k'Ulí, yoɗ yi y' giyye baadaɗ. <sup>14</sup> T'urzi yode geɗ Raa y'in uɗɗe t'adda k'oldiko, y'in t'ize tambobino a oldikadiɗ te.

*Almasi mozigo t'ekki sulɗi pay*

<sup>15</sup> Raa geɗ wenda yi k'aane yi ki y' wolle ye, wo in woliyo Almasi geɗ, yoɗ miɗ Raa koyok.

Yoɗ geɗ yi jiiɗe sulɗi don pay Raa y'ikkima,

<sup>16</sup> kono t'urzi yode, Raa y'ikkima sulɗi don pay a kandaane wo a siido,

sulɗi don in'ni woliyo wo don in ki'n woliyo ye ton man,

kane undiyagi don pay a dandaane k'ume, kane don deero, kane don an d'ede urzi ki dokkiyo wo kane don an d'ede toogo.

Kane pay geɗ an ikkima Raa t'urzi k'Almasi wo a Almasi.

<sup>17</sup> Yoɗ ede too ki poone Raa y'a okkima sulɗi pay geɗ me,

wo t'urzi yode kane suldfi pay geŋ an d'ôhire a umayan me.

18 Yoŋ eego, wo tuddí kane dfoŋ pay ogiyso ti suma k'Isa.

Yoŋ eesiyo ki suldfi pay,  
yode wede i-bildfe ki poone wo ki daayum ti diine dfoŋ unto,

kono y'a koone wede goole t'ekki suldfi pay.

19 Derec, yo Raa batum yi dihe suldfi dfoŋ pay adda k'addí wo a tuddí geŋ, a tukk'Ulí toŋ inkinno ede pây,

20 wo t'urzi yode, Raa y'a dihe suldfi dfoŋ pay y'ikkima,

ise a siido ise a kandaane toŋ, an di-kimo an di t'okkiye ti yode Raa.

T'urzi puuzo k'Ulí ere íbi ekk'undumu wede zaapu t'ekki bakadí kaŋ tontilko geŋ, Raa y'an d'ele toose.

21 Wo kune toŋ ti kaaga kun likke aa torgagi dokki ti daana Raa me. Kune dfoŋ k'aduzí, kun d'ilkite kun d'ise oldfiko, wo oldfiko kun ti t'ize.

22 Wo anken, t'urzi k'unto k'Ulí ere ki tudde gette, Raa y'un ti'n gimo kun t'ukkiye ti yode. Y'ize inkinno kono y'un di'n t'etta dfaanadí kune dfoŋ kamilen, daa k'oldfiko munda, d'uwu an k'ambe sundugun k'ulsuko ye. 23 Wo geŋ i dehu kun di seeda daayum zakidí wo toogo a urzi zaapu k'addugun a Isa me, wo kun gi di ledfde dokki ye t'urzi Rabila Majjaanawa ere in zaapu elkisadin eego gette. Tode ere kun illiga, an di gizite a d'uwu adda duniya pay, wo nuŋ Pool en n'a t'ize wede naabo kono ni kazita rabila gettiyo.

### *Naabo Pool a ɗoŋ ogiyso ti suma k'Isa*

<sup>24</sup> Anken nuŋ ulbó unse a dabaradó ere n'ooniyo adda naabo ere n'isiyo a kune gette. Inkinno maŋ adda tuddó n'a-ti ɗange dabar k'Almasi ere yi ni wiike n'a dabire kono tuddí te, wo to tuddí tin kane ɗoŋ pay ogiyso ti suma yode. <sup>25</sup> Nuŋ ni t'ize wede naabo ki ɗoŋ pay ogiyso ti suma k'Isa, a-t'ette a naabo ere Raa y'o ele a beezó ki noogiyaguŋ: nuŋ n'un di kizite ono Raa pay. <sup>26</sup> Ono geŋ kane munda wede t'ume k'eesiyo ombide a ɗoŋ pay, wo anken Raa y'an t'iifiba ita a ɗoŋzí. <sup>27</sup> Raa y'a dihe y'an di y' kize a ɗoŋzí munda wede ombide geŋ, yoŋ goole i jiire wo laalayí baadaŋ, Raa yi y'ize a nooga kane ɗoŋ pay Yawudiyagi ye. Wo kun wollo munda wede ombide geŋ, yoŋ Almasi adda k'adduguŋ, t'urzi yode kun di zaapu elkisaguŋ a gooliko ere ki Raa gettiyo, kune toŋ adda kay. <sup>28</sup> Inkinno maŋ kaye ay kazita rabila ki yode Almasi a ɗuwo pay. A wede tuuku toŋ ay yi di tookiyo kuudí wo ay di y' dooyiso t'urzi suuniyo k'ono ɗoŋ pay, kono kane pay an t'ise ɗoŋ i-dirse a urzi lekkiyo ere kettiyo kaŋ soo ti Almasi. <sup>29</sup> Geŋ inkinno ni naabiya wo ni ɗeyyiso ti toogo ere k'Almasi y'o ele, tode gette ti naabiya adda k'addó ti toogo.

## 2

<sup>1</sup> Inkinno maŋ nuŋ ni dehu kun di suune ɗeyyiso ere zakidí ni ɗeyyiso kono kune, kono ki ɗoŋ Raa a geeger Lahodise\* wo kono ki ɗoŋ Raa baadaŋ ongo nuŋ batum t'edayan an ki n'

---

\* **2:1** 2.1 Lahodise: Geeger ita waaya ti geeger Kolos, adda polɗe ki Likus.

wulle ye. <sup>2</sup> Ni dehu addan i-t'ône ti toogo, an di lekke kettiyo kan soo a urzi geyyiso tuddan wo ôoniyo ti eego soodo a elkiso. Injino an di y' suuna munda wede ombide ki Raa me, yon Almasi batum. <sup>3</sup> Laale pay wede ki suuniyo k'ono wo ti suuniyo gette, kane ombide a bey k'Almasi. <sup>4</sup> Ni raaniya injino kono wenda soo ton y'un ti'n mabilda ye t'urzi k'ono don k'a t'ese derec me. <sup>5</sup> Derec, nun dokki ti kune me, wo ton elkisado daayum ti kune, wo nun ulbo unse a munda wede n'ollige, kune kun sooru ki diine kan soo wo kun seedu zakidi a urzi zaapu k'addugun a Almasi me.

*Lekkiyo ere kettiyo kan soo ti Almasi*

<sup>6</sup> Kune kun umbe Isa Almasi yon Galmeega gen, injino kun oziro daayum kettiyo kan soo ti yode, <sup>7</sup> aa undumu sondayzi i ti diige, wo kun zaapo addugun a yode aa wedusu yi zaapu boy itadi zakidi. Kun soodo daayum zakidi a urzi zaapu k'addugun a Isa wede an unni duuye genno, wo kun rooto koduwo a Raa t'addugun pay.

<sup>8</sup> Kun koon mentikagi, kun i oola urzi a wenda soo ton y'un ti'n mabilda kun t'ora adda k'ikka ki suuniyo k'ono don daa k'urzizan genno ye. Suuniyo k'ono gette t'ettiyo t'urzi k'elkiyo ere ki duwo wo t'urzi k'undiyagi don toogo i-dokkiyo duniya genno, tode gette t'ettiyo t'urzi k'Almasi ye. <sup>9</sup> Ni rootiyo injino kono Almasi a tuddi ere aa ki wedusu gette, suldi don pay adda k'adde Raa wo a tuddi gen, a tukk'Almasi ton ede pay. <sup>10</sup> Wo kune munda un ki'n biite ye a urzi k'Almasi me,

kono kun aa ti gitte kaŋ soo ti yode, yoŋ goole t'ekki kane doŋ pay an d'ede urzi ki dokkiyo wo t'ekki kane doŋ pay an d'ede toogo.

<sup>11</sup> A lekkiyo ere kaŋ soo kun aa ti gitte t'Almasi gette, aakede kun uune waldu ponde, waldu ere ti bey wedusu ye, wo waldu ere ettiyo t'urzi k'Almasi. Waldu gette y'un ize aame munda wede adda tuddugun y'un di'n t'ettiyo k'adda k'oldiko geŋ, y'un ti y'udfe. <sup>12</sup> Kune an unni zuyye batem geŋ aakede an un ti'n ittiba kaŋ soo ti Almasi†, wo kun di-bilde kaŋ soo pây ti yode me, kono kun umbe a toogo ere ki Raa a bilde Almasi ti diine doŋ unto gettiyo. <sup>13</sup> Kune ti kaaga eggun aa unto a daana Raa me kono kun aa ti diipida a urzizi, wo kono munda wede adda tuddugun y'un di'n t'ettiyo k'adda k'oldiko geŋ yoŋ botto daa k'adfiya. Wo ankeŋ kune Raa y'un ti'n bilde kaŋ soo ti Almasi me, y'in t'ize tambobino a doopidadiŋ pay ere in aa ti diipida a urzi Raa geŋ me. <sup>14</sup> Raa geŋ mattup ere yi-kaza oldikadiŋ t'inni sakiysa gette y'a-t'iide mentú baa, tode ere adu ti kine kono a urzi k'oogoro Raa. Yi-t'iide aame Almasi an ti y' tiike ekk'undumu wede zaapu t'ekki bakadi kaŋ tontilko. <sup>15</sup> Soŋ undiyagi doŋ an d'ede urzi ki dokkiyo wo doŋ an d'ede toogo ton, toogadan Raa y'an ti d'igite aame yoŋ y'anni jiiire t'urzi k'unto k'Almasi ekk'undumu geŋ me, y'a ti'n wiire a daana doŋ pay aakede an zidfo bulagi t'ume k'arka.

<sup>16</sup> Inkino maŋ kun i oola urzi a wenda soo ton

---

† 2:12 2.12 Kun wollo adda mattup ki Romen 6.4.

yi deƙƙa booro eggun a urzi k'ombo ye, ise a urzi sobo, ise a urzi laayagi, ise a urzi k'aagulu tere, ise a onniyo ere ki puukiyo ton man. <sup>17</sup> Kane pay gen Raa y'in elo aa undiso ki munda wede san a etto, wo munda wede d'erec ki kotto min, yode Almasi. <sup>18</sup> Kun i oola urzi a wenda soo ton y'un ti'n dagga ye, y'a t'eesa aggagun umbo a kandaane me. Kane gen a daana duwo an ti t'isiyo tuddan don i ki koliyo tuddan ye, wo son ulban unse an ottilso a maaleekiyagi. Kane gen an aa seedu zakidi baadan a munda wede y'an ettiyo aa suniye. Kane don inƙino gen ti elkisadan ere a urzi tudde gette, an koliyo tuddan ki makilsa, <sup>19</sup> an ki dehu an ki lekke kettiyo t'Almasi ye. Ki too man Almasi batum yon eego ki don pay i ziipe addan a yode, kane gen tuddi. Kune kun suune eego gette ti modfiyo tudde pay, wo t'urzi tode okilagi ti sondayi an ti t'okkiso tudde pay kan soo, ti d'ohire aa Raa yi dehu. Gen inƙino kay ki kine don i ziipe addin a Almasi me.

### *Unto wo baldiya t'Almasi*

<sup>20</sup> Kune t'ume kun aa ti gitte kan soo ti Almasi gen, aa kun t'inda ti yode, wo y'un di'n udfde ti bey k'undiyagi don togo i-dokkiyo duniya me‡. Wo de ki moo me kun di lekkiyo aakede kune a bey k'undiyagi don i-dokkiyo duniya sey me? Kun d'oyyiso kun di daaniya ita k'urziyagi k'oogoro don aakede: <sup>21</sup> «Munda en k'ambu ye», «Munda en k'owwiyo ye», wo «Munda en ki bottiyo ye» sey me. <sup>22</sup> Urziyagi gen an rootiyo ti suldi don san i-t'engilso aame duwo an ti'n isiyo

‡ **2:20** 2.20 Kun wollo adda mattup ki Galat 4.3.



mañ. Kane geñ urziyagi k'oogoro wo dooyiso ere ettiyo t'urzi ñuwo ñañal. <sup>23</sup> Kane an un rootiyo: kun di daane urzi Raa wede kane ñuwo batum an ilkite, soñ kun ti-t'ise tuddugun ñon i ki koliyo tuddañ ye, wo kune batum kun dabirsa tuddugun. Derec, urziyagi pay geñ a eda ñuwo an t'isiyo beehiye. Ki too mañ kane ki bita, kane beehiykadan tin a urzi wede tudde ti dehu ñañal.

### 3

<sup>1</sup> Kune Raa y'un ti'n bilde t'Almasi kañ soo, inkinno mañ kun deho suldi ñon a kandaane, a ume wede Almasi yi-guune a ammade Raa\*. <sup>2</sup> Kun d'elke ki poone a suldi ñon a kandaane, a suldi ñon a siido ye. <sup>3</sup> Derec, kun t'inda t'Almasi kañ soo, wo lekkiyagun ere aware Raa y'un ele gette itatu i ki t'iidiba ye botto, tod'te t'Almasi a bey Raa. <sup>4</sup> Lekkiyagun ere aware gette, un t'eliyo Almasi ki daayum. Inkinno'n aame y'iina y'an ti giza tuddi a ñuwo mañ, kune ton Raa y'an di kiza tuddugun a ñuwo ti yode Almasi kañ soo, wo ñon pay an di wolla daryikadi gette kune ton adda.

#### *Lekkiyo ere ti kaaga wo ti ere aware*

<sup>5</sup> Inkinno mañ suldi ñon pay ulpi a lekkiyagun ere a siido gette, kun ti'n adido mendan ti biza k'ulbugun me, suldi ñon aakede: boliyo, suldi pitiniko, naapu, suldi ñon ulpi tudde ti dehu, wo okkiso a suldi pay. Suldi ñon kee k'okkiso eego geñ, i t'ize lonqayza i jiire Raa. <sup>6</sup> Ita k'oldiko

\* **3:1** 3.1 Kun wollo adda mattup ki Soom 110.1.

ere in̄kino, kulkuwo Raa ti-d̄eegu a tukki d̄oŋ i-ti toogiyo a yode me. <sup>7</sup> Geŋ kune toŋ kun izire in̄kino aame ti kaaga kun likke adda k'old̄iko geŋ me.

<sup>8</sup> Wo d̄e an̄keŋ, kane pay geŋ kun di sebbo darguŋ, suld̄i d̄oŋ aakede: kulkuwo, zehiso kulkuwo wo bundiko. Soŋ kald̄ita tudde, ise ono d̄oŋ ki sukuyagi toŋ i k'ad̄de ye ti biziguŋ me.

<sup>9</sup> Kun lihite ono ti tudduguŋ ye, kono lekkiyo ere old̄o ti naabatú pay kun t'iili, <sup>10</sup> wo kun t'umbe lekkiyo ere aware. Geŋ kune d̄uwo d̄oŋ aware, wo Raa yi naabiya daayum adda k'adduguŋ kono kun deeye aa yode wede unni ziipe. Y'isiyo in̄kino kono kun di y' suune a ceere ki ceeriyo.

<sup>11</sup> An̄keŋ âhuntu tudde umbo a edayí me, ise eŋ Yawudiyagi, eŋ Yawudiyagi ye, ise eŋ d̄oŋ i wilda ponde, eŋ d̄oŋ daa wald̄u, ise eŋ d̄oŋ daa suuniyadan, eŋ d̄oŋ k'ita d̄uwo aa seydi, ise eŋ fule, eŋ fule ye toŋ maŋ, wo munda wede a di jiiire pay Almasi, yoŋ yi lekkiyo adda k'adde ki d̄oŋ pay i ziipe addan a yode.

<sup>12</sup> Kune Raa y'un ti'n ize d̄oŋzí, y'unni biire wo y'unni giyye baadan. Kono kamo kun iso naabo ere aakede: kun wollo sommagi d̄uwo, kun iso beehiye, kun kili tudduguŋ ye, kun koona d̄oŋ tasse wo d̄oŋ an d'ede ombiŋe. <sup>13</sup> Ise wede tuuku ti lekkiyadi lekkiyadi toŋ kun soodo tudduguŋ, wo aame wede ti diinaguŋ i-d'ede ono ti bakadi maŋ, an aa t'iso tambobino ti tuddan me, aa Galmeega y'un t'ize tambobino a kune pây. <sup>14</sup> Wo t'ekki suld̄i pay geŋ kun geyyo tudduguŋ. Geyyiso tod'te aa sibe wede un ti'n kettiyo kune pay biŋ biŋ.

15 Geɲ toose ere k'Almasi ti dokko biza k'ulbuguɲ. Geɲ inkiɲo Raa y'unni wiike kun di lekke pay adda toose gettiyo, kono kune tudde soo. Wo Raa kun y'elko daayum. 16 Geɲ rabila k'Almasi ti laalatú pay i lekko adda k'addugunɲ. Kun dooyo tuddugunɲ, kun tooko kuude ti tud-dugunɲ ti suuniyo k'ono ere pay. Kun ôoro wo kun rooto koduwo a Raa t'addugunɲ pay t'urzi k'ôrdari d'ɔɲ ki tamma Raa, ti ôrdari d'ɔɲ k'ono Raa wo ti d'ɔɲ ettiyo t'urzi k'Unde Raa. 17 Suldi d'ɔɲ pay kun ise geɲ, ise t'urzi rootiyo k'ono ise t'urzi naabo toɲ maɲ, kun iso a suma ere ki Galmeega Isa, wo t'urzi yode kun di roote koduwo a Meega Raa.

*Urzi lekkiyo ere aware*

18 Ni rootiyo a kune erayi, kun kili t'ekki kuu-lugunɲ ye, inkiɲo beehiye aakede d'ɔɲ i daaniya urzi Galmeega an d'isiyo.

19 Ni rootiyo a kune kuuli, kun geyyo eraygunɲ, kun an ise baaze ye.

20 Ni rootiyo a kune inɲi, kun ollo ono pay ki maawugunɲ, geɲ munda wede Galmeega ulbí i-d'ise unse.

21 Ni rootiyo a kune maawi, inɲigunɲ kun ti'n kulkuwe ye, para maɲ tuddaɲ a rorriga.

22 Ni rootiyo a kune bulagi, kun ollo ono pay ki galmaawugunɲ d'ɔɲ a siid'ɔ. Kun ise inkiɲo aame kane a d'aanagunɲ kono ulbaɲ an d'ise unse d'oo ye, wo d'e kun ollo onamaɲ t'adde soo kono kun orgiso a Galmeega Isa. 23 A naabo ere tuuku kun isiyo gette, kun ti naabo t'addugunɲ pay aa kun naabiya a Galmeega batum, a d'uwɔ

ye. <sup>24</sup> Kun ise injkino kono kun suune kun t'ooney munda wede Galmeega yi dehu y'un t'eley t'adda suldi donj yi boohiyo a kandaane a donji. Geŋ Galmeega wede kun i-naabiya miŋ, yonj Almasi. <sup>25</sup> Wo a wede i ki sooru ki diine ye geŋ, Raa yi-t'ela danjay a sooruzi ere ki diine ye gette, kono Raa geŋ y'inni wolleiyo kine duwo pay miŋ kaŋ soo†.

## 4

<sup>1</sup> Ni rootiyo a kune galmaawi, kun an iso beehiye a bulagugun me a urzi wede ki diine derec, kono kun suune kune tonj un d'ede Galmeega a kandaane.

### *Kooke Pool wede ki danju*

<sup>2</sup> Kun soodo zakidi a urzi tonديو Raa, adda tonديوagun kun lekko zeere wo kun rooto daayum koduwo a Raa. <sup>3</sup> Wo aame kun tonديو Raa geŋ, kun tondo kono kaye pay, kono y'ay di t'ihina urzi ay di kizite onami a duwo, kono ay di roote munda wede ombide Raa y'a t'iidiba ita t'urzi k'Almasi. Geŋ kun suuno, kono ni gizite onami, ankenno nun adda danjay me. <sup>4</sup> Injkinon man kun tondo Raa kono rabila k'Almasi te n'a ti roote kereŋ, i dehu n'a-t'ise.

<sup>5</sup> Kun lekko ti suuniyo k'ono a daana donj i ki suune urzi k'Almasi ye me, a peedo ere tuuku kun uune a daanagun man. <sup>6</sup> Ono donj adde ti bizigun geŋ aase unse ti sumadizan, wo kun suuno kama k'ono t'urzi wede beehiye a wede tuuku tonj man.

---

† 3:25 3.25 Kun wollo adda mattup ki Deeterenom 10.17.

*Toose ki Pool ere ki dangu*

<sup>7</sup> Tisik leemadey wede ki geyyiso ay naabiya kaŋ soo a urzi naabo Galmeega me, yoŋ wede naabo yi seedu zakidí a naabo Galmeega geŋ, rabiladó pay y'un di-t'eley. <sup>8</sup> Inkiŋo maŋ nuŋ ni y'agisa toc miŋ, kono y'un di kizey mummino ay lekkiyo me wo y'un di-tasseŋ addugun. <sup>9</sup> Yoŋ an'te ti Onezim leemadey wede ki geyyiso, daayum yi seedu zakidí a urzi k'Almasi, yoŋ ti diinagun. Kane geŋ an un di-t'ídey taaya a suldí pay doŋ isiyo a enno.

<sup>10</sup> Aristarko wede adda dangay ti nuŋ en y'un t'ize toose, wo Markus taasa ki Barnabas\* toŋ y'un t'ize toose pây. Yode wede n'un ruute kun d'isey mummino ti yode aame y'iiney di kune maŋ. Aame y'iida di kune maŋ, kun yi soodoy bey sire. <sup>11</sup> Isa wede sundí soo Zistus toŋ y'un t'ize toose pây. Ti diine Yawudiyagi doŋ i ziipe addaŋ a Isa geŋ, kane ado geŋno danŋal i naabiya ti nuuno a urzi Moziko Raa me. T'urzi kane geŋ ni d'uune toogo baadaŋ.

<sup>12</sup> Epapiras wede naabo k'Isa Almasi yode toŋ ti di kune, y'un t'ize toose pây. Adda tondiyadí ere kono kune gette, yoŋ daayum wehini yi k'ormiyo ye. Yi ton-diyo Raa kono kun di seeda zakidí, kun t'isa doŋ i-dirse a urzi k'Almasi, wo doŋ iyye aase suldí doŋ pay aa Raa addí i dehu. <sup>13</sup> Nuŋ batum ni wulle t'edayó y'oodíbe yeebadí baadaŋ kono kune, kono doŋ geeger

---

\* **4:10** 4.10 Markus taasa ki Barnabas: I-kaza Markus geŋ miŋ ulo leema meegí Barnabas koo, ulo ki teema mekki Barnabas koo maŋ, daa suuniyo.

Lahodise wo kono ñon geeger Irapoli† pây gen me. <sup>14</sup> Lik wede ki geyyiso yon wede daawiya, kane ti Demas ton, an un t'ize toose pây.

<sup>15</sup> Kun an t'iso toose a zemba ñon ki Lahodise, ti teema Nempa wo ñon ogiyso ti suma k'Isa adda ñoytú ton, kun an t'iso toose pây. <sup>16</sup> Aame mattup ere n'un raaniya ette kun ti girey man, kun an t'agiboy a ñon ogiyso ti suma k'Isa a Lahodise, an di-garey kay. Wo zemba ñon a Lahodise ton mattup ere n'an riine gette an un d'eloy, kune ton kun di-garoy kay. <sup>17</sup> Anken kun i-ti rooto a Arsip gen y'a soodo zakidí a naabo ere an i ele a urzi Galmeega gette, y'a ti-dango ti beehiye.

<sup>18</sup> Kun wollo ume ki toose ki nuñ Pool en, i riine nuñ batum ti beezó. Un dandé ye nuñ adda dangay me.

Gen beeko Raa ti koona eggun.

---

† **4:13** 4.13 Lahodise ti Irapoli: Kane gen sirwan pay geegiryagi ita waaya ti geeger Kolos, adda polde ki Likus.

**Mattup ki Taasuwa ere Aware  
Mukulu: Mattup ki Taasuwa ere Aware (New  
Testament)**

copyright © 2019 Wycliffe Bible Translators, Inc.

Language: (Mukulu)

Contributor: Wycliffe Bible Translators, Inc.

All rights reserved.

2020-11-19

---

PDF generated using Haiola and XeLaTeX on 21 Feb 2024 from source  
files dated 29 Jan 2022

523c1c0a-f8ac-5d2f-aebe-7063b0de6b23